

四庫全書

集部

欽定四庫全書

集部

清惠集

目錄
卷二

詳校官中書_臣沈 颺

中書_臣劉源溥覆勘

總校官知縣_臣繆 琪

校對官編修_臣吳裕德

謄錄監生_臣徐 瑤

欽定四庫全書

集部六

清惠集目錄

別集類五
明

卷一

詩

卷二

詩

卷三

奏疏

卷四

奏疏

卷五

奏疏

卷六

奏疏

卷七

序

記

卷八

碑

墓誌

墓表

贊

祭文

卷九

書簡

卷十

書簡

卷十一

雜著

卷十二

附錄

臣等謹案清惠集十二卷明劉麟撰麟字元

瑞一字子振江西安仁人後流寓長興子孫
遂隸籍焉弘治丙辰進士官至工部尚書初
麟觀政工部時即與同年陸崑抗疏爭諫官
下獄事及為紹興府知府又以忤劉瑾褫職
後官尚書卒以爭蘇松織造為宦官所擠而
罷蓋始終介介自立者其自紹興歸也依其
姻家吳琬於長興與孫一元文徵明等往來
倡和世傳徵明神樓圖即為麟作也是集凡

詩二卷奏疏雜文九卷附錄一卷麟曾孫懿
陞所編萬厯丙午湖州知府無錫陳幼學刊
之長興朱鳳翔為序稱其文出入秦漢詩則
駸駸韋杜譽之固未免太過至稱其標格高
入雲霄胸中無一毫芥蒂故所發皆盎然天
趣讀之足消鄙吝則得其實矣是亦文章闕
乎人品之驗也乾隆四十六年四月恭校上

總纂官臣紀昀臣陸錫熊臣孫士毅

總校官臣陸費墀

金文日曆全書

目錄

清惠集序

當世廟初旌別大僚御屏所書冰清玉潔者二人一為尚書劉清惠公麟一為大理卿陳公恪陳歸安人世稱矩齊先生是已劉豫章人先從安仁徙建業慕吾湖山水清遠復卜居吾邑東山之坦上因號坦翁云不佞鳳翔少時聞諸先達公杜門絕軌臺使監司守令之車轍盈門不得一見惟佳時勝日與高士吳甘泉孫太初諸公扁舟往來菰蘆間人望之若神仙已復睹公家所藏

神樓圖知公居萬山中欲構一樓而不可得文太史徵
明繪是圖以贈一時名公歌詠盈幅已復讀公所撰峴
山浮碧亭碑記文最爾雅其所傳尺牘書法人間重如
璣璧及索公全集大都散逸即陳大理公子方伯公應
和有所撫次亦以垂索故寢梓適錫山筠塘陳公來守
吾郡詢及郡中典刑慨然有當于清惠公遂徵其集幸
伊曾孫慇懃藏若干卷文則疏也簡直出入秦漢詩則
駸駸韋杜益公之標格高入雲霄胸中無一毫芥帶故

所發皆盎然天趣讀之足消鄙吝恍若濯魄冰壺澄心
玉井者想公之在朝耿耿大節如忤逆璫瑾首倡節慎
庫等事足垂不朽守越甫五十日而百姓歌思尸祝之
王學士華為去思記比之劉寵至今稽山有二劉祠公
歿且五十餘年而其剛介絕塵之姿孤高軼世之品凜
凜猶有生氣筠塘陳公固公臭味公之集若有待於今
日語云豐城之劍合於延津信然哉信然哉萬歷丙午
秋七月既望朱鳳翔序

欽定四庫全書

清惠集卷一

明 劉麟 撰

詩

四言古詩

述懷五詠

今我樂矣敘舊以賢瞻彼明德不以厥年生事匪多尺
宅寸田暮色惟瞑返照復鮮君子保終夕厲惕然載我

玄酒踐彼初筵悠悠我心無懷葛天

其二

今我樂矣塵勞靡夕俯仰褒然乾坤歸宅冠蓋各天妻
孥在側知己辰星道途掃迹空谷足音使我太息返照
入林牛羊是則

其三

今我樂矣自春徂秋高人用息志士迺愁終風急雨恐
撼吾樓樓有真人邈不可求求而得之泛我輕舟三山

何許垂老一遊石川野航曰予銷憂龍驤虎變挾小九州

其四

今我樂矣爰即我謀陂塘雨足上下其流百年垂盡寄興孤舟華胄玉臺浮遊石頭羣陰蔽空百神在樓此夕何夕夢遊九州初隨枕蝶終執沙鷗興倦而覺再夢再憂空谷多鬼其聲啾啾

其五

今我樂矣漸解塵緣藏修還謚始於今年八十有六十
一師籤同生之士艾耄洵然我孫森森玉立滿前仰憶
宗祧瓜瓞綿綿升高有屐臨流有船邀我良友矢我新
篇退休於室守真尚玄不收於人不求於天詔爾後人
勿忘勿愆

五言古詩

山中奉答孫太初

望古復望古駕舟行遠空浮雲日夕盡天光上下同潛

鱗入淵微歸鳥正西東
亭亭夫容花淒淒風露中
羣情各有適至理將在躬
日月去已多憂傷來無窮
臨流一濯足顧影見雙蓬
歌我水上心答彼巢居翁

答太初和韋蘇州

道存甘拙守時艱
慙幸生在昔繆有寄所至皆名城
感彼民物憂違我泉石情
一朝印章解歸來讀且耕
年登衣食足心閒
文字精側身鷗鷺中
塵網何由撓

動靜語

客言動靜機相禪苦不了無私動亦得無欲靜逾妙動
靜能幾時去去勿復道

携琴晒古

疎疎子賤子千載一單父斯民不忍欺厥治登太古問
渠何所修得賢以自輔談笑黃虞間豈復問齊魯孔鐸
本夙聞舜絃時一鼓赤子爾何知所欲在慈母吾施既
春陽物化若時雨至今梧桐枝金徽照寰宇

秋社次苔溪吳大叅韻

舉世重豪華何人愛幽獨達哉晉處士遠心寄松菊物
理本尋常道勝乃芬郁前哲流其風吾生踵其躅貫酒
箬水頭援琴峴山曲青錢掛高筇紫團出深竹篔簹渭
之濱猗猗淇之澳徐徐柳外嬉款款花邊肅道義常交
傲聲利久不辱熒熒長生桃輝輝內光燭觴詠集浮洲
形骸歸寓屋逍遙本今夕分攜在明旭

社韻

天壤有勝事其逢或千春顛昂復藻雅天興何彬彬鋪

觀同生志天寶亨厥屯文明鬱然起大半充詞臣即有
未遇者清修常苦辛頗厭東吳富不道西越貧龐然自
宜俗安問桃花津社中諸長老玉立高嶙峋引翼並眉
壽几杖集今晨鳴絲雜揮毫晤語協真醇一會義已正
再會心彌親相觀各有得退食如見賓翩翩穴鳳翥光
華動星辰樂善不吾棄垂死善吾身天目無茂草太湖
有揚塵精英一以聚千里成荆榛斯言苟不輕請問商
巖人一朝食君食為霖如有神嗟嗟委巷樂遠遊不獲

伸安得如椽筆大刻垂蒼珉燕鴈年年社銘名日日新
我德如廣川毋為物所湮

讀書臺

暮色常如斯孤真保終吉愛此嘉樹林倚杖數晨夕有
時高鳥下馴擾不吾避好音醒遠心文羽耀真憇昏鴉
結侶歸燒燈猶未食耽幽有餘興減食非所惜逾八又
五年吾生過其歷無事此堦中古期或可必舉觴祝吾
樹願樹五千尺何必莊家椿得氣各有適

和文內史陸春官

清時兩文伯表裏吳門居三生契晤後八袞衰頽初揮
毫引星漢飛珮入雲壚佳境本已寂芳塵未全疎袞袞
信未度鼎勒良有餘酒醒對蕉綠葉盡還一書

寄文衡山

戲馬非芳春征鴻逆新暑去住本無心隱顯不成侶令
德自有隣予美胡獨處東野昔為陰渭城今欲雨假寐
始難任沉憂終不去夜發吳門書晨集清溪路中多鶴

髮人待子聯滕語一誦虎林偈何人不延竚

書逸老詩冊

歲晚田園歸遂遠夔龍革弁嶺若天紳亭亭日相對紫
翠中有精靜應得其槩朝舒五色霞食之益五內感彼
造物者遺我平生愛氣序日已遷兒女日已大尚齒登
君堂考老自成會宿約引壺觴晨興理冠帶椽筆洒雲
根樓船蕩湖靄客操如意鈎擊我珊瑚碎青蓮白蘋洲
銀刀紫花瀨何如安期生鶴背不可載

神樓

天生樓上翁百年渾是病遭時或振步顛沛干吾正中
歲幸投簪有物如造命擇栖苦不早乞湖何必鏡吳興
逸老成春秋迭觴詠從此作行窩東南稱獨盛契哉文
內史繪樓孤且曼謂我居其中懷葛失其靜從此不復
下得酒歌明聖問余何所得樓中有真性

次陳魯南韻

民社闢身地淹留廊廟心能將製錦意和曲比鳴琴鸞

鳳有文翮低回枳棘林食我中園竹貽我希世音覽德
起翱翔來歸阿閣深春光照城郭桃李成繁陰雨餘清
樹枝團團明月峯懷君妙生殖古道重相尋

東吳甘泉處士

閒園臨廣壑蔓草帶蕪葭歸來理荒穢繞屋皆桑麻曉
起惜芳時抱瓮清澗涯露下百卉長羣蔬亦惟嘉陶翁
南山豆邵子東門瓜一身在力食外物何由加

贈沈竹里

我愛竹里子身世一秋蟬吟風興自足吸露心充然下
有穀食者生荷主人憐亦有草食者依依戀平阡豈不
競肥腴何由更高騫嗟余感君誼撫已思齊賢平生志
寡慾老為衆物牽卓哉無欲地咫尺不可攀聞君重文
會切磋如有傳為余辨斯惑拜領春風前

神樓漫詠二首

青嶂隱澄潭鍾靈自太古結樓翠微間雲中啟朱戶風
簾半在鈎月射人高步安期不可期霑濡惜多露

其二

七十已無友百歲誰知心
獨徃日欲暮悲歌天地陰
卜居謝人境結樓深復深
殘軀幸有託安得揮黃金

寄甘泉

為圃何汲汲所樂在煙霞
露下剪青紫或取黃金芽
朝厭芳脆時時易魚蝦
舉清澗曲一醉當山花
今晨共誰酌明夕去君家
及爾各強健言笑歡無涯
幽求苟如此曰以忘紛華

桂竹歌

桂香何冉冉不以春吹噓竹枝何青青不以寒卷舒所以學道者愛惜如璠璣軒窗當其下琴書與之俱感彼賦命偏忘此生計疎修途既坎壈短景又玄虛老色朝無賴秋聲夜有餘荆南王子燦於世竟何如

招石川入社

結知自臺省僻境亦窮追君年睿而富我骨衰以遲拙劣世遺矣昏塞君忘之睽離本多岐會晤幸有時佳名

超九棘古誼冠諸者三吳得白石握手登黃羲米舟書
與畫良足解我願請與此心誓金蘭歡不移

與李半溪

朏朏五湖水水滸多遺老官罷各來歸優游遵故道驚
塵方蔽空無一掛懷抱永謝車馬喧但知衣食好社飲
已再三嘆想苦不早

其二

古今重八袞何幸懷君年余也湖心水君如水上船大

風揚其波千尺不敢先俯仰社及社唱酬篇復篇鳳聲
雲日表蟬號風露前耕桑本一曲杖履得相牽多聞已
諧約直諒不違天飲酒或取適放懷空萬緣此誼幸不
孤瑚璉同一川烈烈青州守吐氣成雲烟前年入我室
百斛甘我泉自云招南村慷慨沾十千今晨踐斯約逸
興揮蠻箋月斜裘足去天地俱茫然臨別敢一博一安
還一遷呂望及衛武何如聃與錢東施與西施異代知
誰賢

七言古詩

輓王封君

一心齋古高雲多瀟灑衣冠在耆耄許身孝義日月懸
傳家節操珪璋潔三槐陰鬱敷廣堂栽培雨露瓜初隄
槐生直幹當清霄槐有深根下盤結如旦如曾自本源
生封死謚推前烈秋風瑟瑟吹白楊秋草芊芊帶孤碣
鶴馭飄飄去不還杜鵑啼盡寒江雪

覆陳魯南

我居深山真木石一年易過如一日人生難得白髮時
且許於今髮已白髮白有方可再黑感君惠我不死術
百年總與一日同世間豈有壽多百青山白雲天外天
一日一醉與君別

竹鹿歌與張石川

每過城市常噓嘻此竹此堂懽不疑仁和酒肆貂可解
蘇晉禪床筍可支年年兩醉若天造一日一社無人知
朶頤解醲夙所鄙雕蟲綺麗晚不宜老人至樂在無事

良朋適興相追隨彼此生兒頗不惡
兩家門戶粗支持
幾人負米可糊口幾人弄筆粗解頤
名山秀水取便得
抹月披風飽即嬉仰學螭涎力已倦
俯逐蠅利心不羈
與君擇勝論中曲切切怛怛艾復耆
儻儻俟俟媒和侶
瑟瑟亭亭連理枝同生交做聚
其畔朝燕夕楚將焉為
富貴豪華等蜂蟻營營擾擾真堪悲
握手桑榆日西下
放舟大壑山之陔窪尊輪囷亦何有
勸酬莫計黃金卮
有時酒渴得甘露蟬吸滑滑清入脾
酌露壽君君莫訝

金莖仙掌青天低頌君直擬淇園物青青如篔簹常猗猗
懷葛之民渺何許有斐君子真吾師盟神默祝九十五
清歌抑戒酬吾師

七褻詠

我生忽忽逢稀年回看故路如飛湍點檢同生多變遷
高塚壘壘成古阡入山結屋招畊錢丹訣久昧無真傳
欠伸偶作邯鄲眠鶴背飄揺牛女邊八洞高張無一仙
問之皆稱元節賢邀趨玉帝駕班聯覺來蒿榻生寒烟

暮捲西風梁月懸南國諸公修白蓮貴遊清福能兼全
有書切勿言歸田上天下天皆杳然

和李半溪社韻

寄言同社諸人賢莫訝嵇康習性偏眼前樂事取便得
身後浮名何足傳千峰好拾金光草片石今生玉井蓮
有酒不醉本凡士著書取勝非高玄張騫曠遊最竒絕
中夜揮毫白日眠

與彭西巖話舊

清溪道士何所之有客擔簦溪水湄吾亦東堂坦吾腹
仰淑諫議酬吾私此時門牆二三子循循雅飭仍惔惔
大夫持鐸梁州去踰河蹈海絲多岐彭君索居寡儔侶
穿楊屢蹶心淒其天王赫怒事征討助邊小試勲名竒
成均卒業歷年所一官遠授鄙之涯銅章墨綬贊名郡
蓮幙風清行采詩高堂日暮泣相送但道兒歸不可遲
春去秋來衣未改一笑登堂鄉井疑太守欲留留不住
百姓攀車車已馳俸錢可數恰五日宦囊惟有商山芝

我亦鄙產賀未得相見惟言祿可辭東堂舊遊星欲曙
秋高見菊聊追隨嗟吁彭君不可羈天留一脉尊其師

山靈一首

恢恢大造垂深仁九死老翁今七旬俯仰三才慙有身
人心為主道為賓敗國亡家三孽臣曰貪曰痴曰嗔
更迭為崇興災迤浸淫六氣來徃頻分張六賊常相因
邇來理攝偶不臻危機一墮與鬼隣忽返靈根一綫新
再見區宇一芳春出凡擺俗守爾真結廬京野披荒榛

探幽秉道收元神鍊精鍊氣初泱辰蕩滌諸魔如掃塵
清靜無為游至淳夢中如見三茅君手把丹書申復申
覺來知失桃花津山靈不厭羲皇人

六旬壽誕

飄飄天路躋元始眇能視兮跛能履中歲騫騰華屋居
老去盤桓石堦死石堦安穩亭內光八牕洞達唯圖史
陳睡陶酣庾亮樓人境不喧心遠耳一笑青雲足下生
苦盡逢甘良獨喜過去流光不用追向來短景今方是

天授蓬壺三十三曲中
颺袖從風起閱盡乾坤勝事歸
長生寶籙成仙紀
亭中端坐嚼蟠桃金門方朔今如此

山居靜養

古來明哲守厥身
天下國家難比倫
有欲無欲恒守真
仙珠道王保抱頻澹泊無為康
我神蟠龍翥鳳孰可馴
華山枕畔華胥人
纔聞避紂復避秦
天然一曲桃花津
擷蔬和甘泉韻

我家旨蓄須遇霜
連根拾取無青黃
黃者初熟本時食

青入海沙成宿藏道人齒決事可做大官手拔不逾香
肥甘與此同一飽底用形役令心忙憐我初年負鼎俎
每持此味升巖廊美芹自知堪獻主鹽梅已見能興商
一從棄置等封菲蝦菜滿船成獨狂百年餽粥無多瓮
頓消心火生清涼

與吳甘泉

六月淒其萬木彫斧斤斬伐皆柔條蚩尤怒觸天柱搖
十日並出天無霄援弓力射九已消一陽獨運亨以昭

擊壤老子興歌謠才思湧發如江湖吾聞古帝稱唐堯
治功巍巍德澤饒許由在下貧無瓢甘心寂寞難為招
夔龍稷契苟已足訔謨豈必須芻蕘

與李半溪

寧親夏清正炎暑抱孫上塚集儔侶簪徽世世與物同
以禮為坊君不處孤琴伴鶴如賤貧水蘂自甘君不去
三年問道一日傳坐忘遺照多竒語紫壇玉笈天上天
絳河珠斗遙瞻佇

五言律詩

湖南結社

夏木成陰後春蠶作繭時
暮碑新賜誥橋柱舊題詩
鄉酒淹情素官燈照鬢絲
報君歸去業結侶飲雲巵

赴社次韋南苔韻二首

馳光迎素節過雨眺蒼涼
眷德羣賢集揚休百代芳
簪組味何薄湖山氣正昌
飛塵能變海不到聚星堂

其二

投閒身轉貴養拙道彌尊
百戰開文圃玄窺向法門
取適人難老相觀道自存
雙鳧隨燕至同醉衆春園

野蔬亭

幽居得自怡插槿看成籬
日夕荷鋤倦天晴抱瓮遲
此中多道氣真味少人知
市遠盤飧足齋心剪露葵

寄庾梅山

讀書胡不仕取樂在郊坰
茶烹玉川屋酒熟司空亭
逾七頭初白加旬眼倍青
尋真寒不廢騁望醉還醒

東貞菴

郊壇轉墟曲，鬪愛客藏深。
傍水憐春候，歸城怯晚陰。
短髮年年別，清齋夜夜心。
曹園花發後，誰此共幽尋。

答王履約

短髮半成絲，歸田幸不遲。
色相花三逕，風神竹幾枝。
息機愁市近，取適怕天知。
盡日窮幽勝，躋攀似少時。

答王履吉

病目恨烏絲，臨書較已遲。
涸池常積垢，俗穎慣生枝。
白

下髯仙老清溪子晉知年來王履吉獨契愛鸞師

聽溧陽織

客久全諳俗人勤不但耕造端猶舊學恤緯象吾生
華戶熒熒火空村軋軋聲卧聽隣姥織無限斷機情

懷吳耆舊

已渡橫塘水歸舟茶磨峰別墅新移竹清江正落楓
古衲三生石疎燈半夜鐘忽聞耆舊去飛夢帝橋東

凝香寢

室小已成趣豪吟客未來祥光窺戶牖芳響出蒿萊參
辰駒過隙三五兔生隈守墨凝香枕焉知葛與懷

社中

愛此文字飲衣冠千里同好德競為主忘年恥作翁頌
禱言皆應賡歌句轉工終筵惟敬慎監史愧無功

哭施邦直二首

未閣太初淚再哭菁陽君甲科遭泰運旅襯逐歸雲詩
律晚逾細道情常出羣不堪同眺處相望起高墳

其二

別日青山約開堂屬病身竹間來作主天外候歸人勝
事驚壇社煩冤詫鬼神如何玉樓記橫奪在交親

雞鳴寺習靜二首

寺僻塵緣斷冬暄病骨強扶筇臨仄逕揮塵得禪床近
侍乘槎急賢人問字忙我行無一事吹笛向滄浪

其二

詩篇收寺古石勢帶湖寒白雪終難和丹霞信可飡落

葉深埋磴煙苔曲隱欄經過人未識予著鹿皮冠

蚓蟠

一丘無四隣鹿豕轉相親讀書臺半圯埋筆冢初新種
蕉渾得意刻竹恐傷神生事苟如此何年更問津

憶慧逃禪

老衲歸真久前山春草青古鉢仍留鉢疎燈不照經
暝色寺門月晨光佛殿星舊時香火伴滄海見孤萍

成隱莊

死去真無事生來又苦忙
短髮淹湖郡傷心問溧陽
萍水夢初覺斃灰意不忘
社空梁月在愁思滿滄浪

閒居

撤屏從山色開門待雀羅
已與妻孥遠無煩賓從過
積雨雞聲近流塵鼠跡多
龍珠辨亦苦光影發雲窩

酌故人有感

鄉井多才俊睽違奈老何
著論人羣少修文地下多
得意不能薦感時聊自歌
酒杯有深味百歲幾經過

南坦讀書堂

盡洗侵輿竹來聽轉壑泉
萬花初映谷五柳欲飛綿
弱子將迎婦隣翁許借錢
讀書臺下雨種玉比藍田

憶故人

恨別秦淮水思君夢過橋
文章空白下道義立清高
貧病勞相恤衰頹幸見招
今年花甲遍鄉信轉迢遙

贈吳宗魯貢士北行

積雨報新晴蘭舟結侶行
十年滄泮壁一旦謁承明
夢

中愁說夢名外始知名魯城沂水綠春服喜初成

咏年

花甲從頭數逢人却問年愛身輕世味得道重林泉減
祿真成福聊生况有田同年誰獨健長憶看雲眠

飽嬉

官罷年年稔深居物物情花前見乳燕柳下聽啼鶯閒
門得鳳字濁酒薦魚羹常日飽嬉處石牀雲氣生

渡江

官遊三十載不到此江頭
屨氣增吳潤雲容帶楚愁
浪立星河近鯨搖身世浮
狂飈碧樹隕春老不如秋

山居

鐘定添香坐雞前
宿火眠競辰聊散帙
入已即逃禪
永日圖南榻輕風范蠡船
若無風雨病不負古稀年

東聞一山二首

耕稼苦不飽皇天意
若何渥恩忠士少
清福善人多取適
尊三戒息機消百疴
泰道本無事鹽梅空自和

其二

雞犬下柴扉，桑榆轉夕暉。
力食知今是，酣觴過古稀。
杪秋辭藥物，中夜攬裳衣。
道情無著處，風竹正依依。

詠竹屏

老圃無穿鑿，多君自作屏。
初萌兒女象，解籜弟兄情。
風戛鳴璫近，煙棲翠幄橫。
老人逢細字，為爾早篝燈。

與吳甘泉三首

抱病多沉思，開懷喜奉君。
黃花雨外夕，白髮社中人。
酒

泛諸峯綠詩傳五字新
駢駘忽不語幽賞向誰論

其二

重陽不風雨芳宴更逢君
采菊年年節登高處處人
病與山形瘦愁隨鶴髮新
鳴絲間清吹向晚為誰論

其三

自家五湖上弄水輒忘歸
落日看蓬鬢臨風澣故衣
食貧隨自省傳病見官稀
舍比林和靜寒梅對掩扉

贈耿郡伯

晚歲河梁別驚塵失雁行宦遊多慨感君至有輝光物
潤班班雨天晴夜夜霜漢廷還汲黯猶自重淮陽

與李半溪二首

文字百年飲衣冠千里同好事競為主忘年恥作翁欲
禱言皆應賡歌句轉工終筵能淑慎監史愧無功

其二

我欲占春飲紆衡心事同懸知傳舍客未卜主人翁酒
熟先扳醉詩成莫問工交深敢自慰名教有微功

飛玉臺成

眠雲初構寢歌鳳築層臺披豁三光入虛涵萬象開看
花能獨坐秉燭喜重來真人騰日問飛玉到山隈

凝香寢成二首

天上元無寢書邊舊有臺爽氣朝朝入翔雲面面開一
叟披裘坐羣公駕鶴來異香乘紫氣浮動碧雲隈

其二

臺小已成趣豪吟客未來首山當戶牖散帙出蒿萊迎

駒過白隙送兔下蒼隈脉脉凝香卧馬知葛與懷

霽宇

盱望本無期烟雲斂盡時輕風燕雀語麗色鳳凰枝
鄴架書攤徧謝屐去何遲古初一披露真宰不能知

清惠集卷一

欽定四庫全書

清惠集卷二

明 劉麟 撰

詩

七言律詩

頌朔待漏

一統車書又紀年
燭燈燒夜對風煙
番番月令迎新候
剪剪春風向曉天
玉律總頌皇帝朔
金蓮嘗賜近臣筵

共期膏澤為民下莫漫心煎感歲遷

己丑科殿試閱卷

宮闕東偏紫閣西九官分局主恩齊明明撫運收才俊
穆穆臨文自品題手詔日中垂藻鑒御書時暝散雲霓
安車打伴南宮宿中使宵傳有御批

天壽山公幹二首

風雨驅車出禁城侍臣辭印暫經營壯遊兄弟今誰健
老去君臣自有情千古威靈如日近九霄香火與雲平

椒房七載恩多少漫別君王向此行

其二

鶴袍病骨蕪山役禱祭虔欲代天雨過紅門千嶂出
雲歸玉殿九龍眠誅茅闢土憐今日短栢新松擬萬年
聖壽無疆仙馭遠老臣垂涕洒寒泉

分獻北海

氤氳佳氣布遙空肅穆皇禋仰帝宮夕駕鯤鵬珠斗外
夜交溟渤彩雲中幽都宅潤歸神貺玄象無波識聖功

赫赫司徒時並入曲陽飛石泰壇東

顧華玉謫官全州二首

暫屈高賢論未平
召歸行見聖明心
共憐此夜參辰散
獨向殊方瘴癘生
衡嶽長沙才子路
澧蘭沅沚故人情
中州父老憂何劇
墮淚甘棠有頌聲

其二

遠道新恩意若何
到州惟有桂婆娑
娑氣還光岳完名
少
天晚才賢謫官多
心逐鴈書迴嶺路
香分蘭佩隔湘波

千年屈賈真知己尚想搗詞獨酌過

恒陽餞喬白巖二首

斗柄潛移忽指西蒼涼呈影衆星稀古雲殘柳知誰綠
閑苑流鶯轉自啼日日風雷聞偃稼湯湯霖潦惜沾衣
當年太華峰頭路應與圖南訂此歸

其二

雨昏書劍對秋看衢路冥冥生晝寒時羨叔孫終制禮
人榮疏傅早辭官交深不謂離羣易才大惟憂用世難

一笑浮圖高處別此中猶可望長安

寄李古冲太宰

向寺論文氣獨雄真才端擬亮天工金淵剌燭春翻蝶
茗水傳觴秋轉蓬展氏道昭三黜後劉楨今在九人中
武夷高並神仙宅謝屐張槎好過從

壽文衡山

人日衝泥獻壽卮追惟舊學老吾師際天丘壑聊揮翰
滿目風雲盡入詩淇澳青青歌竹後渭川瀾瀾得魚時

仁明見說東朝出何事商山久茹芝

題許柳溪太守卷

經書萬卷世生香曳履星辰總雁行列戟門牆猶謹厚
一麾江漢自循良天垂湛露恩難並風繼甘棠業有光
誰繪柳溪溪上柳映空膏雨似鄖陽

春日道中

賤買魚鰕換酒嘗漂陽風物似丹陽疎林細雨開精舍
古岸驚飈遲短航滿釘盤餐逢野老久張衾枕住他鄉

寒帷遠憶西溪叟，愁見春鴻有斷行。

開新社

搖曳舟車上國來，歡遊不許鬢絲催。
湖心夜月思君並，巖畔春花逐我迴。
醉有狂歌書草木，閒尋往事掃莓苔。
江城別社收耆舊，轉眼湖南有棄才。

卜里

人日驅車向溧陽，尋幽擇里靜中忙。
官無苛政民風古，國許蠲租帝澤長。
星駕獨迴鳧曲釣臺，遙亘水雲鄉。

鷓夷老去難飽繫鰕菜閒情伴野航

送周司寇

野寺淹流雪滿枝錦帆何意厭春遲
千年神劍知離恨一夕寒燈長鬢絲
卿月乍臨南極上法星常照楚江湄
更攜經笥翩翩去碧草溪連處處隨

夢岱屏崔京山

尋君不似夢君頻永夜添香養道真
下榻論文光炯炯升朝對面禮循循
腰橫卞玉輕於葉手挽吳鉤絕有神

一咏百篇星漢落虛懷猶避太常人

僧慧過訪

泠泠碧潤轉林霏旭日諸峯散遠輝
小立暗香常襲履
緩行空翠欲沾衣
高僧偶過分餘靜
鄉使遙傳訝久違
門有扁舟從箬下
清酣長望兩鳧歸

峴山社燕

峴山能醉即香山
蔗境誰人識
最閑冉冉慈雲生
海屋
霏霏紫氣隱禪闌
千年好事同聲應
九老真風一咲還

寄語元豐諸將相有人圖入會昌間

與蔣石菴

病入新年較轉多
光迴腐草竟如何
尊踰九老終當避
義重三生強一過
露浥金莖人盡醉
春融玉燭鳥齊歌
雍容宮保天垂眷
八袞揮毫鬢未皤

與陸玉厓

古來明哲重先幾
伯玉空知徃歲非
夜月輝輝開李酌
秋風瑟瑟洒陶衣
滄桑只在身前變
松菊真從夢裏歸

最憶與君為別處烹羔送酒說漁磯

詠喬桂

醉捻高枝當酒籌少年折此比仙遊
今拋世事死前死不向人間求
所求枝葉盡除皆實地高明漸近是吾樓
誰云月窟無門逕短夢能棲最上頭

登觀海樓

乘桴老去笑無功莫以周流歎道窮
六街車馬浮烟外千里鳶魚一鏡中
攬勝欲呼今夜月憑虛時遡古人風

報君此去蓬萊路况復朝宗盡向東

平望舟中

鷹脰湖邊送客歸剛談今是又全非鳳凰枝上披雲錦
牛斗聲中賦短衣韓幹慣傳神駿骨巖陵不下老漁磯
獨憐殊勝僧無事載筆牽裳過虎溪

和蔣石菴司空社韻

風情常繫白鷗堤時序頻驚紫燕泥造物無情人自改
山靈有相道盟齊都將健體酬佳句合把深盃酌此溪

一笑幾時頭轉白煩君莫負手中藜

次白巖山中韻

古製新傳手自裁滿頭瀟散看雲來
歌如孟老元宜菊折似林宗不受埃
鳧履有情從此狎鷗機慣見不相猜
皤然洛社羣公裏黑髮高簪共草萊

同白巖遊蒼巖二首

直窮幽勝幾人來兩壁齊雲繡若堆
丹堊橫空飛閣起螭龍擎日梵宮迴
僧棲石罅頭顱易花散珠林眼界開

方外閑居為第一掃煙時卧說經臺

其二

巖陰鐵遂度行雲天樂真從上界聞絕澗俯看雲起處
危梁倒跨石中分醉磨蒼蘚留題遍靜倚青松彌益勤
五十年來方一到可教三宿又離羣

聞征都勻諷曹中丞

都勻雖固且休征國有訐謨不在兵入井祇須憐赤子
開疆何以及蒼生古稱干羽還能格近用羈縻亦暫寧

我憶麟臺趙充國屯田千載有餘名

恭遇冊立中宮

王教開端萬古傳厚哉坤軸上承天洽陽渭涘祥何定
豐水岐山數已先荇菜入歌風穆穆睢鳩有象興翩翩
因憐至聖刑于化須和周南第一篇

甲辰春社

曳履晨征試越羅芳園踐約正春和琴心迭奏臨幽澗
酒意微醺上曲阿張弛總闕吾道在風情未必古人多

堯天蕩蕩渾無事
擊壤相將起浩歌

送龍致時回金陵

山館梅開又落花
歸心日日渡江沙
孤舟悵望平湖盡
尊酒流連春日斜
與子共分清澗水
幾時還入白雲家
好知學道須凝靜
莫漫都城戀物華

湖上晚渡

老興翩翩只自由
皇天賜得五湖舟
花開酒美不一醉
水滿月明常獨遊
處處登樓頻弔古
年年垂釣儘銷憂

有時斲睡乘流去
夜度香山蘆荻洲

投閒

春船載酒隨鷗去
曲曲陂塘草自生
棹拂浪花迷遠近
窻迎雲月問陰晴
常收藥物年年健
早蛻塵縵事事輕
一上神樓愁更下
始知閒處有勳名

植江蓮

谷口春泉一鏡開
深深逕路接層臺
幽棲謝客常無事
老興看雲只自來
欲著方書酬白髮
好將生理付青鞋

多君為我沉疴計玉井芙蓉願早借

李民育誕日

鬱葱佳氣抱層臺竹裏賓筵取次開
隔座笙簧綠岬起倚天屏障入簾來
逡巡送酒客拚醉頃刻能花仙有才
會報赤城丹訣獻光垂南極在霞杯

聞京師建社二首

京國誰開社約新乾坤一脉繫情親
盡登耆舊歸仁里莫遣風流落後塵
草草盤飧從古俗班班圖史總天真

春筵朗月通南極常照江城鶴髮人

其二

古俗淳龐百好空我來開社少人同春來耕鑿王民後
老去衣冠聖澤中翻咲鄉音咻衆楚却沽村酒似新豐
月明烏雀橋邊路照見柴車鶴髮翁

與西溪甘泉聯句三首

幽談不盡坐寒宵懶性真能遠市朝卧向好山猶是夢
飲從鄰叟不須招燈前白髮人俱健身外浮名念已銷

他日里中還結社一溪風月醉蘭苔

其二

折竹聲頻夜已沉夢寒應繞玉山岑溪容隔歲將移棹
草色逢春映盍簪雨暗細評高士傳地深時見古人心
明朝更有南池約吟對梅花思轉深

其三

隔簾風絮正漫漫點壑穿巖好醉看冷色映貂秦嶺上
凍雲浮檻越溪寒低迴玉女凝粧素偃蹇山翁得句難

咲索梅花轉壚曲杳然清夢落江干

寄白巖太宰

蒼巖高處少人行宦不為家去住輕病後形骸皆長物
老前丘壑有餘榮即看彩鷁浮星漢不用朱旗插斗城
寄語早朝鐘鼓客北窓紅日正希昇

李民育別號有竹

灑灑新梢正倚空歲寒門巷幾家同清陰不斷三湘雨
淨色長含萬里風欲借勁枝為椽筆更栽高節製漁筒

狂來直造非無為，看竹何須問主翁。

壽張水南學士

憶昔論文傍紫微，碧桐丹棘共菲菲。
青宮進講恩常並，玉殿含香願不違。
道在師儒身漸達，人歸啟沃事全稀。
遙瞻壽域開天闕，却詫文星在近畿。

孫太白苔溪草堂

歸藏卜筮向澄潭，鷗鷺初盟亦未寒。
硯墨洗雲沉靜影，釣絲垂月亂文湍。
風前遠嘯應輕阮，雪裏深居不愧安。

有約過來東望劇少微騰彩動秋巒

與吳甘泉登董嶼絕頂

山當天半氣全清影入湖波覺世輕
足下過雲應縹緲此中看月更分明
狂來欲賦傾才思醉後重登是性情
却向歸樵時訊問轉疑深麓可逃名

題画

黃石赤松師授遲夢中牽引住茅茨
充閭又識曾孫面賜杖仍過八袞期
陶令真陶惟任酒放翁能放不緣詩

舍情欲問磻溪叟，斷送仙凡一釣絲。

夢得九十

晨起常先夜卧遲，曾無晝寢亦無詩。
痴頑正合玄虛妙，辛苦都非利祿時。
天上歸來無鶴伴，谷中剩住有僧知。
百年本是囊中物，只以狗名損一碁。

南野堂用韻似陸柱史

高誼如君迥不鄰，晚於夷險見情真。
當臺持簡久無與，滿閣著書還幾人。
共引江湖懷往日，獨分花鳥向青春。

更嗟堯舜方圖理却使山中有逸民

留別孫太初二首

住本無心去亦輕江湖深處更逃名水能迴棹如多恨
山不留君空自清細草長松收健句夕陽朝雨對離情
雲鴻未隔人間路應報紅顏羽翼成

其二

夕燈蛩語上空堂門外芙蓉繫野航高興逐雲先到寺
離心入雁不成行黃花伴客年年雨短髻彫秋夜夜霜

歧路無情人自遠酌中戎馬過重陽

九日

初日輕煙隱薜蘿轉疑詩句在山阿道人不上青峰久
黃葉忽隨霜鬢多獨把菊杯迎物候故偏風帽起高歌
川源淨好能無雨如此重陽一謾過

喜聞古冲赴台兼訂殊勝寺之約

明王玄攬與天通論相超然邁古風望愜羣心臨翥鳳
情深共語屬冥鴻最親東出新迎日不改商巖舊夢中

官府神仙恒斷絕
言詩何地可追從

靜虛院再集

麥田鋪翠寺門開
行盡松筠上佛塔
壺觴擇勝人人醉
香火逢僧事事佳
豪吟漸覺隨年薄
僻性終難與俗諧
春雷漸覺時驚聽
猶有風雲感舊懷

同李半溪春社

山亭共酌卧莓苔
燈市纔收花又開
皓首屢承同社約
青羶猶記隔江來
岫翁抱道真空世
白也言詩獨擅才

欲把漁竿銷蔗影中阿堂畔有高臺

空明樓

望中樓觀倚天開老協山林勝事催檻外風雲扶雨過
梁間日月近人來幽尋出世延諸佛逸興辭家近五臺
已卜吾身有仙骨青牙殘醉斗邊迴

五言排律

答李半溪

丹竈非真訣青蚨豈壯圖遠心辭里巷清興落江湖世

網浮雲隔庭幃衆美俱綵服迎詞客華筵走靜姝素侯
天富貴黃髮日懽娛有子輕千乘知翁歷萬夫

贈顧華玉

彪炳得之子鬱然滄海精詞華追往哲道範迪羣英雄
章時倚馬聲價日連城簪組已文鐸鉛丹仍短檠郡借
董派筆鄉歸李劭評鞞發真千里籠收擅八瓊偶遭傾
蓋語遂辱斷金盟載酒論竒字題銘謝大烹移舟乘月
曙揮塵坐參橫幕卷霏微雨燈挑長短更一夕持衡去

三秋薦剡成感時精鑒別慎職盡才名燕集歸無幾鶯
遷去有程能將此別意播入古人聲慷慨上世訓徘徊
知己情椽笛隨歌咽斝樽雜淚傾籍籍今安定翩翩老
向平清歡苦未足遠道本難輕自合酬天子何因變友
生惟余做義範垂死獨牽縈

五言絕句

春日

紅稀天有情綠暗春無興遊子雨中眠夢裏年光盡

看月

滿月昔未滿清輝常恨誰請看虧欲盡正是有情時

賓旭堂述懶

騎馬不如昔尋僧怯上船山中農務息懷抱白雲眠

病中答饋藥二首

坐室延師易登城取藥難感君傳遞至蹴踏試尋山

其二

肺病經冬苦仙丹此日傳若能安枕卧徐問董公年

過王履吉墓二首

歲序嚴凝日仙踪斷隔時
荒途無古劍高塚有新枝

其二

壯歲同遊地今晨獨到時
夜臺無健筆殘菊有空枝

題秋江

熒熒有奇色紫雲無數新
含咀得至理終屬商山人

寄故人

蒲葦三秋渺雲霞一鴈鳴
片帆江海夢無限別離情

種花二首

好事今餘幾
頻年不在家
老興層臺上
擔燈夜種花

其二

舊土新鋪石
登臨日幾回
若逢雙足老
與我看花開

七言絕句

龍津門徑二首

潭水澄清靜
裏心紫雲常
護紫姑神
耽遊誰似丈夫子

肖出丹丘贈與人

其二

終歲尋真未得真
歸舟猶幸及殘春
吾家玉女潭如玉
入谷通天自隔塵

寓上興莊

蒼蒼原野思依依
咫尺茅峰東與西
空齋養性無人共
午夜時聞雞一啼

有竹山居二首

懶殘吟眺過春時
芳恨猶傳石上詩
天遣風雲常愛護

莫教磨滅共花枝

其二

佳城寂寂長莓苔
縱我臨觀日幾迴
千載松楸人共老
飛鳧常向月中來

寄聞一山二詠

排山風雨正懷人
阻絕江舟自有神
池塘春草今晨夢
自插荆花滿角巾

其二

茅屋新營獨貯春自甘清苦作閒人一尊清醑牆頭過
不用陶家漉酒巾

山居二詠

山空睡起鳥音稀平野虛堂萬象輝白髮翁來蒼栢下
一樽徐論桔槔非

其二

十年山館始圍牆竹裏開門筍正長但著小車行得過
不嫌春露濕衣裳

欽定四庫全書

清惠集
卷二

九

懷漂尹王從喜

記得空堂酌我時角巾清夜雨絲絲道機談罷雙鳧去

秋草芊芊滿路歧

鵝

城南秋草碧於烟無數白鵝隨我船風帆乍舉鷺呼散

拍水過溪相對眠

題明妃圖

黃雲白磧戍樓空漢殿音微有鴈通纖纖殘月迨迨夢

猶在昭陽女伴中

山中偶成

林扉過雨曉風開曲逕花香碧澗迴一卷道書尋未得
山禽飛過竹梢來

飛霞閣二首

萬松如蓋擁祥烟百尺名臺聚兩川歲歲春風吹杖履
與君同醉玉樓前

其二

欽定四庫全書

清惠集
卷二

十

曉日舒情春可憐輕風吹送艷陽天泗洲堂下深盃後
又醉桃花細雨前

上興別墅答李空同學憲四首

當年事事欲探奇老大無成只舊時卧隱空山朝倦起
却囊碁子謝人詩

其二

坐深楊柳水邊枝似懶都忘是昔時寄得詩來如對語
不知雷電滿龍池

其三

孤坐巖扉意若何
澄清萬象合天多
神明不逐諸魔散
玉露光風轉至和

其四

玉露光風有至和
道人何物竟蹉跎
如顏尚恨違三月
似孟還須集義多

閒情

道人習性似鳩偏
半世無家半住船
書畫捲來剛一束

愁風愁雨過年年

樵話軒

春谷草生殘雪際
石門人去夕陽時
自將數數窮幽秘
只恐隣牆道士知

古意

芙蓉易採波難涉
只恐神龜住香葉
月斜歌枕夢還佳
道情不亂莊周蝶

慨時

盡瘁空悲亦罔功
渭濱老子獨從容
當時諸葛成何事
只合終身作卧龍

新築臺登翫

永日登臺當一年
不風不雨更忻然
門無俗轍身無病
何必飛昇始是僊

逢僧

懷玄默默向誰探
小寺逢僧始一參
日暮孤舟風浪息
滿蓬花雨自毵毵

題廬山圖

畫錦堂開醉客時
蟠桃歲歲與山期
楚人欲獻知何物
攜取匡廬到酒卮

春日偶成三首

日紅方是睡醒時
澣濯從容出每遲
簾幙乍開春正淺
細吟生理上花枝

其二

春園無客晝常闌
高閣沉沉便見山
燕子倏來還倏去

有時繁語破人閒

其三

竹床深處晝烹茶
上有長松下有花
魚躍鳶飛池半畝
不須重問玉皇家

道養

莫將朝市笑山林
一刻清和抵萬金
學到坐忘遺照處
世間何物更關心

夜月爇香

誰寄名香到草堂
山童驚爇煮茶忙
偶然風定月亦至
一縷輕烟百尺長

渡湖

廣文遺韻留樗散
雞犬圖書共一船
自說江湖不歸事
阻風中酒過年年

有懷

卧聽溪聲枕簟涼
懷人中夜攬衣裳
風雷偶作淙淙雨
犬宿雞啼共一房

與聞一山惜別二詠

培塿槁壤藏蚯蚓寂寞寒江走蠹魚
公論百年求斷案送窮文字絕交書

其二

君如陽鳥隨陽至興薄雲天亦苦寒
極目字行中斷處月明蘆荻又江南

與文衡山三首

長烟樹杪見羣山過雨亭前響碧灘
暮色牽情不知去

喚誰來共倚欄干

其二

濕雲初斂見橫山
百道鳴泉落遠灘
詩在眼中無客共
興隨飛瀑遠長干

其三

水長平蕪兩岸齊
千峰迴合樹高低
正憐虛寂存吾道
莫遣時人識此溪

築坦上

秋風誅茅結草廬庭容旋馬地無餘面山臨水足真意
與兒對窓俱讀書

楊松泉水亭

直窮幽勝掃莓苔竹裏虛亭向水開天上重陽且風雨
飛鳧時過五湖來

三月十日飲半溪家

長幼魚魚鼓柁來正愁春盡擬登臺堯夫玩易圖南暉
說夢逢痴亦怪哉

聞馬千里店有衡翁畫可買上有樓未贈先題
夢卜乾坤第一流明王圖治說殷周商巖渭水傳真處
千仞丹崖有似樓


殊勝寺

乍逢琴鶴碧湖來披氎匆匆夕舉杯意得乳羊扳一醉
博公嘲咲下三台

擬於石川舟觀北樓卷

津吏傳呼太宰來米家船裏似樓開陽關唱徹瞻辰卧

南極何年接上台



清惠集卷二

欽定四庫全書

集部

清忠集卷三

四

詳校官中書_臣沈颺

中書_臣劉源溥覆勘

總校官知縣_臣繆琪

校對官編修_臣吳裕德

謄錄監生_臣徐瑤

欽定四庫全書

清惠集卷三

明 劉麟 撰

奏疏

開言路以衛國體疏

工部觀政時上

竊聞天下猶一身也朝廷腹心也公卿百執事四肢也
諫官耳目也欲使腹心安固必四肢耳目各舉其職苟
視聽不廣則手足無措而心腹為之不寧欲兼所愛必

兼所養也故言路之通塞生民之利害闔焉天下之安危係焉臣等聞之古先哲王嚮明而治天下使瞽獻典史獻書列士獻詩庶人傳詒近臣進規親戚補察公卿比諫工執藝事以諫冀在得聞其過而已今之給事中御史職專於是正惟耳目之司也故國家政務彼皆得聞之聞而有見彼皆得言之君人者養其聰明納其忠盡鑒其心作其氣使其遇事敢言無所畏避亦兼所愛則兼所養也但居是官者言苟切直則不見用而身危

必得罪於一時不切直則不可以明道必得罪於後世
若夫忠亮之士慮不顧身寧得罪於當時而不忍得罪
於後世此切直之言所以上聞於明主也蒙死而竭智
人臣之心果何為耶仰惟我太祖高皇帝稽古定制設
六科十三道等官綸音下降使封駁之章疏上進使執
奏之政治得失事機大小悉許論列凡以廣視聽而決
壅蔽亦以曩時瞽史近臣規獻之類也列聖相承一遵
成憲凡民間利病無不周知百三十年海宇乂安良以

此耳皇上即位以來明目達聰虛懷納諫天下舉欣欣然以承休德將一紀于茲矣邇者科道等官以言事冒干天威臣等來自疎遠未知所言何如但人臣事君有官守者修其職有言責者盡其忠彼職當言路因其官守盡忠納言夫復何故使所言有理固當采而行之設或過當豈宜深罪今天威震動臺諫一空見者側目聞者寒心四海之內誰不解體恐自此忠直骨鯁之士退讒諂面諛之人進承順風旨羣下雷同倘事關利害誰

復為陛下言之乎耳目蔽塞心腹病生災害之來何可
云喻臣等無官守言責之寄不宜關得失之辭但臺諫
既設則朝廷之得失在臺諫臺諫既虛則朝廷之是非
在天下况臣等荷作養之恩濫側士流嘗念儒者當以
天下事為己任故不敢避鈇鉞之誅輒敢越職論事誠
非為諫官惜為天下國家之大體惜也伏願皇上垂恩
採納將各官早賜赦原俾其還職供事一以開諫諍之
門一以杜奸欺之漸天下幸甚萬世幸甚

久病妨政懇乞休致疏

雲南按察使時上

臣係南京廣洋衛右所副千戶下應襲舍人祖貫江西
饒州府仁安縣籍由弘治九年進士歷任今職依期到
任管事正德十一年二月內得患痔漏脾泄等病至本
月二十九日因病頗甚不能公座大小事務一切理辦
不前俚由關司轉呈本處鎮巡等衙門委官署管司事
將臣患病緣由查勘明白各另回報施行本年四月內
臣病勢轉加自度不堪任事已將所患病症并臣入任

以來遷除本末具本陳乞致仕差家人抱奏一向在任
調理延今三箇月有餘不惟原患諸病不減又且新加
喘嗽日夜不寧蓋因久病氣血俱虛邊方水土不服顧
茲沉劇愈難望其平復况本司刑名卷吏久已委官署
管臣有合得俸糧亦已行司住支若不再乞天恩容臣
預先起程還鄉切恐病益日深死日益迫萬里間關微
臣將不得生致骸骨而去事或至此於臣可悲於治何
補如蒙再勅吏部將臣查令致仕如臣病勢漸急久候

艱難容臣預先起程且行且藥憐臣苦楚不必治臣之
罪使其得歸終難救藥則臣目瞑故鄉有依之鬼也幸
獲苟存則臣心欣欣皇天再造之人也是臣生死皆不
勝感戴聖恩之至矣

乞免查撥田莊以安民心以重畿輔疏

以下巡撫保定

上時

查訪得各府皇莊先年各差太監旗校人等管理皇親
功臣各亦設有管莊僕佃人等領種希勢取寵者撥置

并吞爭競不明者朦朧投獻而地土之在小民者日侵
月削有司莫敢誰何小民日見逃亡畿內彫零亦已太
甚自聖明登極諸弊一新前項管莊人員通行裁革原
係投獻地土盡歸業主仍令所司徵銀解部係各宮主
者差官類進係皇親功臣者赴部告給公私相全上下
交愛二年以來事體穩便况此項田地佃種既久或昔
雖醵薄而今則肥饒或昔曾灘窪而今則坦夷其原佃
之人又經蓋有房屋種有樹木或祖孫相守或姻婭相

聯俱難於摘離勢逼遷逐恐成激變且先年皇親功臣蒙賜地土踏勘丈量恣肆溪壑加以不才郡縣曲為奉承無賴佃僕巧侍逢迎遂將左右民田因而一槩吞噬力弱者流離殞斃能言者奏訴纏綿又有愚悍之徒聚眾逞兇殺人構禍令軍民人等又有原差主事坐守割取莊田兼以近日螟蝗蔽天迷野毀食禾稼互相驚疑怨口嗷嗷臣既得之聞見不容緘默夫空閒地土虛名無據自撥置爭吞之計行而吏民拱手於昔朦朧投獻

之私作而版籍失真於今民有逋逃之籍國有空閒之名豈真有所謂蕩然無人之境坐待所司舉以畀人哉慨自招佃以來民方得業疆場桑梓之計勞廬墓畝之工費翁翕融融相慶一時不謂旋即奪之如雀在叢如魚在水而忽有異物撲之情何以堪莊田之賜以臣觀之若陛下以股肱之肉而啖心腹之疾必欲盡飽禍不忍言臣不圖聖明在上而有是事也臣又惟攘索無厭者寵幸之大戒錫予有漸者保全之至恩伏望皇上

斷自宸衷割恩以義將陳萬言等奏討莊田盡行裁抑諭令萬言等自省寵祿之厚比之未遇之時豐約何如苟或足供家衆將今賜田莊暫且停免待後子孫繁衍祿食不敷從實具奏方纔議撥猶為未晚必不得已勅下戶部就將各官類進銀兩約量查給仍將原差主事行取回京則民心以安國本以固而所以重畿輔厚貴戚者亦兩得矣

存留預備倉糧以濟艱危疏

嘉靖二年九月初一日奉勅會官賑濟內開北直隸地方災傷重大人民困苦若不及時賑濟必致流為盜賊貽患匪輕今特命爾照依戶部題准事理會同巡按御史選委廉能幹濟官員分投親詣所屬被災地方逐一查勘災傷輕重分別等第作急具奏分豁仍通將各司府州縣倉庫見貯預備贓罰米穀麥豆銀兩盡數查出先儘被災極重次及稍輕地方極貧下戶老疾無依者驗口賑給務使人沾實惠地方無虞欽此欽遵外照得

先任都御史周季鳳調馬前去征勦河南地方流賊王堂等後因騎傷數多該兵部議行將本撫贖罰紙價折解賠補本官遵行查無銀兩將各府州縣預備倉糧行令賣銀折價夫預備倉糧民之大命各該有司不以民事經心平居措理本自不多今又盡行變賣是非棄糧實以棄民况本年夏秋俱各無收人情汹汹發帑開鹽賣官鬻僧此其時也顧乃廢已蓄之儲償擅調之費萬一地方有事守空城以捍多盜指畫餅以賑流民則往

時平寇之功盡為今日殃民之患塞翁失馬在翁為福而行人得牛邑人之災翁計得矣邑有何罪此誠安危所係有難以曲從者當時兵部議賠止謂銀兩未及倉糧殊不知大駕巡行羣姦橫索加以王堂之擾雖解京有名之物亦以移借無算豈復有餘錢在官以此前官計無所出只得糶糧賠馬夫吞馬不能成功固蒙假借於前時而賣糧無以安民又復貽憂於今日及至兵興盜起借馬如前亦勢所必至蓋馬完而事作矣前項倉

糧未賣者臣不敢賣已賣者臣不敢解今奉旨整兵防禦三關又奉勅會官賑濟二者並行百用不足既不助災又復盡取是雖許焦頭爛額而以曲突徒薪為第二義也艱難之際力所不堪伏望皇上軫念將前項已未賣糧俱許存留各該倉庫以應兵民之急將馬價寬至年豐容臣陸續處補臣今亦不敢輒忘馬事如今年二運馬價折銀來文頗遲民以徵收本色重價及至上納俱有餘銀又查得各州縣先年餘剩均徭未追數足其

倒死馬戶經今一年以上不曾養馬省下草料之費又係本馬惟正之入已行各官查算俱為處補之計但今未有的確數目其均徭銀兩地畝草料又奉有勅文賑恤相應暫止委的黃放白催一時理辦不前所以不能不懇懇於聖明寬假之仁也乞勅兵部將變賣倉糧等物計議停止賠補騎傷馬價少候年豐及容臣將嘉靖二年二運備用馬價餘銀無馬孳牧空戶地畝草料先年未徵餘剩均徭酌量民力陸續查追頗有次第即行

照數起解如此則馬價不過減之外府而地方永保無虞矣

地震疏

據直隸天津三衛指揮使司申據天津三衛陰陽生文章等呈稱嘉靖三年八月二十三日戌時初刻自東北方起西南方去地震聲響如雷將官舍人民居住房屋震動人皆驚恐等因呈衛轉申到臣訪得臨近州縣亦有此異各處未見申報除另行外臣聞災之日痛自修

省及行撫屬各府州縣并境內都司衛所兵備守備等衙門大小官員勉修職業省刑緩賦積穀練兵清查囚禁固守城池凡百痛加修省外臣又竊惟聖明在上地道失寧豈無其故誠使中和克致位育不愆則坤厚胡為而震伏望皇上惕然警畏勤學修政惇德召和則庶幾轉災為福實宗社無疆之福也

均驛傳安人心扶公論杜私情以免偏苦疏

准都察院咨於刑科抄出直隸真定府靈壽縣義頭等

社軍民等籍秦憲等奏前事續該本縣民王宗等奏為
復舊規平驛傳以蘇民困事俱奉聖旨都察院知道欽
此欽遵合行抄詞粘連備咨巡撫保定等府都御史劉
煩查照各奏情詞並弔原會議冊卷到官從長勘處要
見從昔何如創制迄今救偏補弊應否可行務在逐件
逐項擇取年老知識備加延訪畫為中正以協官民緣
係地方重情期在公不廢役下不累衆近不避議遠不
貽難所貴融前人立法中難料之弊以通其艱及近時

矯枉中可取之力以資其困事完希將酌處過停妥緣
由咨報等因臣即會同巡按直隸監察御史任洛王鈞
查得國初編定驛傳法制詳明處置停當固無可議但
時異勢殊民貧數極驛遞之宜今非昔比所以都御史
周巡按御史王琳宋鉞彭占祺前後計處雖稱公議實
本輿情其御史郭楠亦曾會議但中止不曾具奏今檢
案間有存者所以中間當增則增衝要免於誤事可減
則減僻靜不致傷財馬數盈縮量力調停之規銀兩多

寡均適緩急之用計地徵糧可以免馬頭獨累之苦募
人當應可以絕官吏求索之私已經議處周詳計慮停
當奏行兵部題奉欽依遵行日久至若禁私交以絕興
販改夫役以充實用處南馬以甦土民公支應以免兼
害四事亦已改正照舊施行見今真定順德廣平大名
四府驛遞流通軍民有便始雖有言皆出於豪強射利
者之主峻終乃無詞又原於司府州縣奉行有則所
以輿情允協土俗相因仍照原題奉欽依內事理欽遵

施行其河間保定二府入站地畝河間府原係徵糧地
內報出船站每畝出錢多至百文少亦不下五六十文
驢站每畝出錢二三十文馬站每畝出錢五七十文地
畝原無彼此而出錢却有多寡所以議將保定河間二
府革去站地名色比照真順廣大四府合用驛傳銀兩
酌量多寡俱於徵糧地內各自通融徵派保定府每畝
徵錢一十五文五分真定府徵錢一十一文順德府徵
錢七文五分大名廣平河間三府各徵錢五文立法本

無不善奉行乃有不至河間官吏查照失真止將徵糧地畝開報却將入站地畝遺落至於徵錢又止於糧地徵取反將站地遺棄又將所屬原編鄭城新中等驛並長蘆楊村等遞運所原額人丁出辦驢頭水夫共一百九十一頭名俱各失於查徵却又將船隻水夫馬驢頭疋減削過多而保定府亦將原額徵糧地畝不曾盡數報出以致二府徵糧地內出錢太多所以物論沸騰人情思舊今查據河間府申稱該府所屬驛遞每年實徵

站銀一萬八千七百四十六兩四錢七分八釐若將所屬州縣原編鄭城新中等驛長蘆楊村等遞運所原額丁夫一百九十一頭名照舊徵收工食共該銀二千二百九十二兩却將原額站地共九千三百五十三頃四十三畝九分九釐三毫五絲三忽六微每畝徵銀一分七釐五毫九絲一忽九微共該徵銀一萬六千四百五十四兩四錢七分八釐二項銀兩通論該銀一萬八千七百四十六兩四錢七分八釐正與原議站銀之數相

合保定府申稱該府所屬原額徵糧地三萬五千八百八十九頃七十一畝四釐五毫五絲三忽漏報地九千四百八十五頃八十七畝二釐二毫六絲七忽照今該每畝止該徵錢九文比照前議每畝各減銅錢二文五分俱各相應改正但嘉靖三年站錢嘉靖二年隨糧徵派已經給驛應用卒難改易合無候至嘉靖四年悉從今處又查得新中驛之在河間委的道里本近使客頗簡涇陽驛之在保定委的道里頗遠衝繁本甚當時取

彼易此不為無見今雖河間路已平復使客衝繁而不
在其下若欲均處以應兩設或移西補東此必告勞及
查兩地俱為腰站止設驢馬車輛接濟送迎別無支應
但使上下兩驛驢馬增多則其中之役自減驛雖不設
物力用舒合無將涇陽驛亦照新中驛革去遺下馬羸
兩路均分除原係各該驛遞刪削而未改正歸原額其
原係改正馬驢等項即查涇陽新中上下四路瀛海鄭
城金臺崔城四驛酌量繁簡如法分派亦足以完其迎

送之急凡此改處事宜俱候會奏命下之日通行保定河間兩府堂印正官選委廉能幹濟官員分投前去先將涇陽驛馬驢車輛查驗明白應歸還者照額發還應改撥者從公撥派遣下幫馬各照原編銀額徵收解送各府填實循環轉候驛傳之急通融撥補涇陽驛驛丞驛吏照例起送改撥別選別叅公廨一所查係原設涇遞舖照舊添設舖兵一名地方一名就彼看守以為往來使客飲食止宿之處不必更動其河間原額人丁徵

辦驢頭水夫工食并原額站地應徵銀兩各查原認之數照冊照卷審派隨糧預徵倘有額外供應本數不足方將徵糧地畝量徵銅錢一文二文濟其缺乏但不許仍前過多其保定府地畝續報數多站錢減派已少再審相同即將先議加重之數一切革去俱不許有虧原額仍出給榜文明示小民俾各知寬減再將各州縣額數通行造報改刊附入原冊以憑查考如此區處真定順德廣平大名四府久無異議河間保定二府又各從

輕涇陽驛官吏雖裁而東西兩路馬驢充足揆之情法
頗皆曲盡蓋救偏補弊事非得已而革故鼎新民用小
康俱由老年知識之人懇告迫切今復詢訪大畧相同
原行所謂通融資次誠解倒懸於艱難困敝之餘也若
行之數年時乖勢異又有窒礙出於臣等意料之外仍
舊審編卷簿具存猶為未晚伏乞聖明裁處

清惠集卷三